



## Орган Лемковского Союза

Выходит в каждый четверг.

Редакция и администрация в Крынци. — Адрес „Лемко“ Крыница.

### Через науку — до добробыту

Тоты, котры бывали в світі, виділи, же в многих краях живе ся людям лучше, як у нас. Селяне мают там красны и молочны коровы, даючи им добры доходы, мают добре откормлены коні и живут в красных и чистых хатах. Напевно у них ест лучша земля як у нас, скаже не оден. Тымчасом так не ест.

Коли приглянеме ся ближе таким краям, як Дания, Естония, Финландия, Швеция, чи аж и Чехословакия, переконаме ся, же грунт в tych краях ест нич не лучший, а навіт иланый, чим у нас. Але там в каждой хаті видно на полиці господарскы книжки, а на столі господарскы газеты. Через читаня tych книжок и газет научили ся там люде правильно господарити и вытягати с землі высши доходы. Книжка и газета дала там людям добры и молочны коровы, чисту хату и достаток.

А у нас, мусиме того собі открыто сказа-ти, — ніт замилованя до книжки, ніт охоты до газеты. Ище часами тот и тамтот прочитат с газеты новинкы о том, же гдеси побили ся на весілю, або на забаві, же злодій окрал газду, або склеп, же авто в'їхало до фосьы и вывернуло ся, але таких, котры бы точно читали господарчу часть газеты, где пише ся, коли и як орати наши нивы, што на них сіяти, як закладати и плекати сады, як вести пасікы, ходити коло статку, домашних птахов, сви-ней и коней, як хоронити статок перед ріж-ныма хворотами и т. д., ест барз мало. А пре-ця не новинкы, але господарчи відомости сут для селянина найважнійши. Они дают ему фахове образование и помагают вытягнути с землі возможно найвысши доходы.

Прото тыж каждый хлопу на селі повинен мати в першой мірі господарскы книжки и га-зеты. Газеты политичны сут для хлопа мень-ше важны, але газеты, в котрой селянин най-де порады господарскы новинни быти для хло-па мастком, бо они и на правду могут помочи зробити ему масток.

Правда — скаже не оден, та оно добре бы было читати господарчи книжки и газеты, але их у нас ест барз мало. Так не ест и то не ест аргумент. Добру книжку о пасічництві, са-доводстві, хові статку и домашних птахов и

т. д. найде ся и тепер в О-стві им. М. Качков-ского, а коли люде зачнут читати и взрослое спрос за книжками, напевно найдут ся люде, котры книжку напишут и выдрукууют.

Не друкуе ся тепер книжок не прото, што-бы не было кому их написати, а тому, што никто не хоче их выдавати, бо друк книжки оплачат ся лем втотчас, коли книжка расхо-дит ся в тысячах примірников.

Книжка ест лем перша дорога, бо коштуе дуже зложене черенок, а при другой и тысяч-ной книжці коштуе лем фарба и папір, отже чим больше книжок друкуе ся нараз, тым вы-

падают они дешевше, бо выдаток зложенея че-ренок раскладат ся на дуже примірников.

Прото потреба лем охоты до читаня у лю-дей, а книжки появлят ся напевно. На разі купуйме тоты книжки, якы сут. Пак будут книжки новы.

Кромі того читайме точно господарчи га-зеты. Таком газетом ест меже иншими и „Лем-ко“. Нас политыка нич не обходит, для нас важне лем того, штобы хлопу жило ся легче на світі и штобы был сильный и здоровый. Прото тыж в каждой газеті поміщаме ріжны порады господарскы и санитарны.

Грошей на книжку и газету не жалуйте, бо книжка и газета даст вам гроши в лучших урожаях вашего грунту.

### Згинул в Парыжі царский генерал

Дня 22-го вересня т. р. в полудне вышол со своего помешканя в Парыжі ген. царской армии Миллер оден с выдаючих ся проводы-ров бѣлогвардейской эмиграции во Франции, оставляючи на столі писмо до своего секре-тара, в котром написал, же иде на встріту с ні-мецкыма офицерами: Штроманом и Вернером.

Ген. Миллер был председателем Союза комбатантов на терені Франции. Его заступ-ником был ген. Скоблин, с котрым ген. Миллер мал дня 22. вересня выйти на конференцию с німецкыма офицерами.

Вышол ген. Миллер и не вернул больше. Пропал, як камень в воді.

Оказало ся, же таких німецкых офице-ров, як Штроман и Вернер совсем не было. Втотчас полиция почала глядати за генералом Скоблином, котрый мал товаришити ген. Мил-лерови, але тот пропал также.

В виду того возникло подозрїне, же ген. Скоблин выдал ген. Миллера большевикам, котрых ген. Миллер был непримиримым про-тивником.

Як доносят французскы газеты, большеви-кы вывезли ген. Миллера с Парыжа до при-стани и оттамаль на совітском кораблі „Мария Уляянова“ до Росии.

Порване ген. Миллера в білый день в Па-рыжі, а также вісти, же выдал его за гроши

совітским агентам его приятель ген. Скоблин, выкликало в цілом Парыжі пригобляюче вра-жене.

Оказуе ся, же в Парыжі дійстеуют тайны сили чужих держав, в виду котрых французска полиция ест безсильна.

Порване ген. Миллера наминают нам та-кий сам факт с перед 7-ох літ, коли то также в невыясненый дотепер способ пропал генерал Кутепов, бывший председатель Союза комба-тантов в Парыжі, по котром обял председа-тельство ген. Миллер. Оба были противника-ми большевизма и обох встрітила така сама судьба.

#### ДЛЯ НАШОЙ БУРСЫ В ГОРЛИЦАХ.

Як попередных літ так и тепер Выділ Ру-ской Бурсы в Горлицах звертат ся до наших людей, а головно до зарядов читалень, с горя-чом просьбом о збор и доставу пожертвовань в продуктах (картофлі, дрова и т. д.) для бурсы.

Собранный товар просит ся довозити до Горлиц.

Выділ Бурсы.

#### Пренумерата в краю:

30 грошей місячно,  
80 „ квартално,  
1.50 „ полрочно,  
3 зл. рочно.

В Америкі: 1 дол. рочно.

В Чехословакии:  
2 кор. місячно, 10 кор. полрочно,  
20 кор. рочно.

#### Ціны оголошень:

Ціла сторона 120 зл., 1/2 сто-  
роны 60 зл., 1/4 стороны 35 зл.,  
1/8 стор. 20 зл., 1/16 стор. 10 зл.;  
оголошения малы за 1 мм. 20 гр.,  
в тексті 30 гр., перед текстом  
40 гр. При місячном и долшом  
оголошеню значна знижка.

Контото чекове Нр. 404.155.

## Война японско - кытайска

Ведля надходячих відомостей, в Кытаю ест уж аж 5 фронтов, на котрых идут завзяты бои. Ест фронт пекинский, фронт на границі Внѣшней Монголии, фронт в Середном Кытаю (Нанкин, Гаукоу и Научанг), фронт под Шанхаем и фронт полудневый, коло Кантона.

Як видно с того, военны операции обнимают чим раз ширше пространство и Япония натрафят на чим раз большы трудности. С перебігу бовз выходит, же Япония не отнесла нияких сукцесов в полнчном Кытаю.

Пять дивизий кытайских, числячих около 50 тысяч войска были окружены японскыма войскама, але выдоставили ся с окружения, пробиваючи ся через японский фронт. На всѣх инших фронтах кытайскы войска держат ся в дефенсивѣ и находячи ся в окопах, могут задержати офенсиву японску.

Така тактыка, примѣняна под Шанхаем и Пекином, дае великы виды успѣха на будущность, бо продолжают войну. Крім того ест ведена с обох сторон оживлена летничя акция.

Двадцет бомбардующих самолетов кытайских обшмаряло бомбами японский корабель „Изумо”, а недалеко рікы Янг-Тсе-Киянг, близко Шанхая обшмарено бомбами японский корабель пасажирский „Нагасаки-Мару”, котрый затопил ся разом с тысячами пасажиров.

В отместку за тото летничя японскы ескадры появили ся над Нанкином, где жие кы-

тайске правительство, нищачи дома и убиваючи тысячи цивильного населеня.

Страшный образ новочасной войны, где не узнае ся ниякого права, а робит ся вшитко, штобы лем знищити врага.

### Будова школ в повітах новосандецком и лимановском

Акция будовы всенародных школ в окрузі школьном новосандецком, обнимаючом повіты новосандецкий и лимановский, завдяки помочи уділяной селам через Товариство Поддержки Будовы Публичных Школ Народных, розвиват ся барз добре.

В текучом року ест уж выконченых, а взглядно буде выконченых до дня 1. листопада т. р. и отданых до ужитку 26 комнат лекційных и 6 мешкань учительских.

В р. 1937. распочато будову школ народных: 3-кл. в Присітниці, гмины Старый Санч; 2-кл. в Зарічі, гм. Лонцко (четверта школа в часі 2-ох літ); 3-кл. школа в Лабовой, гм. Лабова; 2-кл. в Секерчині, гм. Лиманова; 2-кл. в Кониіні, дт. Недзведзь.

Со школами давнійше распочатыма загалом в р. 1937. находило ся в будові на терені округа новосандецкого 25 школ народных о 60-ох комнатах лекційных. Ест то великий добыток сел, осягнений при цілковитой поддержці Предсідателя Повітового Выділа г-на Старосты д-ра М. Лаха и при помочи Т-ва П. Б. П. Ш. Н.

Управа Окружна Т-ва Под. Буд. Публ. Шк. Нар. заинициовала и организовала также акцию заосмотреня школ народных в помочи науковы, закупуючи для тых школ науковых помочей на суму 150.000 зл.

В днях от 2 до 10 жолтня 1937. р. Т-во Поддержки Буд. Публич. Школ Народных у-

ряджат в цілой Польщі IV-ый Тыждень Школы Народной, котрого ціль — кромі пропаганды народного школьництва ест добыте средств на акцию будовы школ и заосмотрене школ в науковы помочи.

Нехай же населене поддержит акцию Т-ва Поддержки Будовы Публичных Школ Народных и не скупит жертв в часі IV Тыждня Школы Народной.

### Допись с Устя Руского, пов. Горлицкого

Я, лемко с Устя Руского хочу помудровати и звернути увагу устянам, а в першой мірі старым и гдеякым молодым газдам. Ест в нашем селі читальня им. М. Качковского, але мі ест жаль, же ест она така бідна и має барз планний будынок.

Сходит ся до чей лем меньша часть молодежи и тотя робит, што може, а больша часть старших и молодших нич не робят, а в додаток ище шкодят.

Не пасуе устяне на вас, бо Усте Руске ест село центральне и повинно давати приклад другим селам. А у нас як ест? Противно, бо устяне берут примір от других сел и то от тых, што нич не робят.

В селі Ганчові зачинают будовати народный дом, в Квятоні также, а в Климковці маюут уж выбудованный. А у нас што?

Я думам так, же як 70% селян потрафилло выбудовати 2 будынки, то 100% може выбудовати оден будынок.

Мали бы мы где посідити и поговорити о своих справах господарских и не подперали бы стін Лейбы. Не ждали бы мы на него, коли вам вліе содовой воды задармо до горняти. То ест стыд! а вы того стыду не видите! Так устяне, час уж пробудити ся и подумати о том, што нам найблизше!

Може я вам за остро пишу, але мусите выбачити, бо я такой простой хлоп, як и вы. Долгий час думал я над тым. Застановте ся устяне сами, добре вы робите, чи зле.

Лемко из за Гомолі.

Доносиме, же в перних днях жолтня поивит ся наш богато иллюстрированный

#### КАЛЕНДАР НА Р. 1938.

и просиме уж тепер присылати замовленя. Редакция принимат также всякы матерьялы и фотографии, относячи ся до культурного и экономичного жита наших сел. Матерьялы тоты будут поміщены в календарі. С пересылком матерьялов треба ся спішити.

## Як поступала рольна реформа в Совітах.

(Перевод с газеты „Весь Польска”).

(Продолжене).

В попередних двох числах описали мы, як дошло в Совітах до знесеня приватной власности и введения на ей місце колективных господарств. Тепер постараеме ся представити, яким способом утворено в Росии „совхозы” (совітскы хозяйства), або камеральны господарства.

В часі домашной войны в Росии большевиком залежало сильно на перетягненю на свою сторону селянства, бо без его помочи не могли они думати о удержаню в своих руках власти.

Селянство представляло велику силу, о чом знал тогдашний предводитель комунизма, Ленин и старал ся тоту силу звербовати для своих цілей. Знаючи отвічны стремленя селян цілого світа до увеличения своего добра и своей землі, Ленин выкористал спрытно тоты настрои и пустил серед селян клич забраня землі дворам.

Хлоп, котрый от віков позерал на дворскы грунты завистным оком, принял с радостью тот клич и виділ в нем выполнене своих отвічных мрій.

Прото тыж селянство поддержало сильно Ленина и приняло участь в революции. Отцы забрали ся до дворских грунтов, а сыны проливали кров за большевицкы идеи. Партия затерала от радости руки и шиковала селянству зраду.

Початково хлопны относили ся до революции с недовірем. Они здавали собі справу с того, же большевики относят ся до справы хлопской нещиро и хотят их выгзити. Зрештом, в початках были ище меже селянством ріжны политичны группы, котры остерігали селян перед комунизмом.

Ленин, штобы позбыти ся оппозиции на селі, одных хлопских проводыров перетягнул на свою сторону, а других поарестовал и постановил перелицывовати своих противников. Он рішил заоферовати хлопам найвысшу ціну. Зробил тото легко, бо знал, же приреченя не выполнит.

Яко правдивый политык, не числил ся с ниякыма прынципами, ходило му лем о притягнене хлопа до революции. Прото тыж отдавал хлопам землю бесплатно и каждый, кто

лем хотіл робити на грунті, мог ю достати. И направду, в многих місцевостях хлопны опановали дворскы грунты и большевики им не перешкаждали.

Маючи такы доказы прихильности со стороны большевиков, хлопны пошли за нима и своим силом помогли им опановати власть в державі и удержати диктатуру. Вотчас никто с селян не повірил бы, же приреченя большевицкы будут цофнены, як лем большевики почуют сильный грунт под ногами и же хлопны перестанут быти панами своих господарств и што станут ся они предметом вызыску и гнобленя.

Где там могли ся хлопны соріентовати в темной и добре обдуманой грі. Большевики выступали перед нима, показывали все, же тепер має хлоп землю и жадали дальших жертв кырви и маетку, конечно потребных до угрунтованя большевицкой власти. Хлоп проливал кров и отдавал маеток. Зрештом не долго пытали ся его о згду. Брали сами и нищили его варстат труда.

Наконец закончила ся домашна война. Ленин побідил своих противников. Білых або розстріляно, або утекли до чужих краев. Роботник побідил, хлоп ся тішил, бо перестал платити жертвы кырви и маетку. Приходили спокойнійши часы. Хлоп думал, же тепер от-

## Од чого зачати роботу на селі

Оден чоловік, хоч бы был не знати який мудрий, не потрафит всього зробити. Особенно трудно выбити ся одному на селі, где ест ся зависимым не лем от ріжних прав и законів, але также от условий природы — по prostu — от Господа Бога.

Селянин, приглядаючи ся роботі своих сусідів, учит ся от них неодного доброго и наберат чим раз ліпшой практыкы. Тот селянин, котрый мае очи открыты и потрафит со счастья и несчастья сусіда вытягнути для себе науку, уходить в селі за мудрого и практычного господаря.

Особенно добре треба смотріти в днешних тяжких часах, коли на селі ест біда. Тепер каждая марна річ мае велике значенє и селянин, хочачи вязати якоси доходы с расходами, мусит о вшитком памятати и уміти вытягнути со всього хосен для себе.

Коли перейдеме через село, то видиме, же праві каждый хлоп робит тяжко от рана до ночи, а користей той роботы не видно. Хаты на загаль занедбаны, дороги планны, плоты валят ся, по садах стары теркы грушкы и яблони.

Где-ж отже діват ся труд того хлопа и чом ніт результатов его роботы? Гдеси пропал, а пропал прото, бо хлоп робил сам, а не было лучности, не было звязи той роботы. А треба знати, же добры результаты дає лем така робота, за котру берут ся вшиткы.

Представме того на примірі. Оден газда в селі заложил собі сад. Огородил фалаток поля и засадил щепы. Покля дерева не родили, было вьсо в порядку, але як дерева розросли ся и почали выдавати овочи — внет счезли дракы с плотя и неодну галузь на деревах зломлено.

Ніт в том нич дивного, бо люде, не маючи овочей у себе, шмарили ся на овочи у сусіда и их обдерли. Не робят того однак люде в тых селах, где каждый господар мае сад коло своей хаты.

Приміров таких можна бы было подати

почне и загосподарит ся на увеличеных грунтах. Чуд, же его отвічны мрії сполнили ся наконец. Тревало того однак недолго.

На першом с'їзді партии и представителей цілого населеня, выбраних при сильной агитации со стороны большевицкой партии, принято рішенє, же земля и вьсо, што ся в ней містит переходит на **власность державы**, а хлопны являють ся лем ей часовыма ужитковниками.

Втотчас были ище смілы люде, котры звідали ся Ленина, где сут его приреченя и чом от них оступил. Ленин отвітил на того, же приреченя дал лем прото, штобы притягнути хлопів до революции, але же николи не думал додержати их, бо они спротивляють ся плянам большевицкой партии. Идея коммунистична стремит до переображеня світа на лад социалистичный. Таким способом уж в рок по революции хлоп остал без землі.

Не была то однак лем формалистыка. Наконец хлоп мог бы погодити ся с утратом права власности, бо можна господарити на грунті и без того права, лем бодай никто не отберал ему того грунту. Але выполняючи рішеня с'їзда, большевики отобрали хлопам велику часть грунтов, котры хлопны присвоили собі в часі революции. С отобраного грунту по-

барз дуже, але уж тот оден доказує наглядно, же лем така акция, котра ест переведена всіма, дає добры результаты.

Ест в Польщі село Лисков, в котром того року была выстава рольничя. В селі том ест каса, sklep, великий народный дом, лазня и т. д. Чи того вьсо мог зробити оден чоловік? Напевно ні! Зробили того всі жителі села Лискова, а же робили разом, пришло им того легко.

Але каждый початок ест трудный. Прото тыж не можна зачинати от річей великих, если ніт на того грошей и средств. Великы річи будує ся поволи. Кооператыв треба зачинати от постепенного выпераня посередника в річах наймарнійших.

Посмотрме знова на примір. В одном селі на Поморі селяне отвозили каждого дня рано молоко до молочарні. Каждый селянин іхал возом со своима двома, або трома бляшанками, тратил час и нищил воз и упряж.

Раз оден селянин скликал сусідів до себе и предложил им, штобы отвозити молоко по черві, раз оден, пак другой и т. д. Початково пристало ку нему лем трох сусідів, але внет, и други переконали ся, же так ест лучше и всі приступили до сполкы.

Тот факт звязал с собом люде и они приступили погодивше до основаня кооператыва. Але же не мали грошей, то зложили яко уділ по 2 метры зерна (у нас можна по 2 смєречкы) и так повстал sklep.

Поволи sklep не лем продавал товары, але также куповал от селян всі продукты, як масло, сыр, яйца, зерно, дерево и продаючи их разом, мог людем выплатити за товар все высшу ціну, як платили посередники. Тепер ест там богатый sklep, котрый обнял всі галузи купна и продажы. А початок до того дало отвоженє молока до молочарні.

С того видно, же ест много возможностей распочати в каждом селі користну акцию в ціли культурного и экономичного поднесеня села. В каждом селі ест дерево, а где его ніт, сут

творили камеральны (державны) маєткы, котры называють ся „совхозы“ (совітскы господарства) Большевик отобрали хлопам для „совхозов“ перешло 80 милионов гектаров землі.

„Совхозы“ повстали на найлучших грунтах, котры належали давнійше до дворов. Што было найлучше в тых дворах, отобрано хлопам и утворено с того камеральны маєткы. До администрации тыма маєтками утворено отдільне министерство, называне у них комисариятом.

Властиво нич ся не змінило в той области. Перед революциом до админитурации камеральным добром существовало министерство камеральных маєтков, котры втотчас складали ся переважно с лісов и грунтов ненаселеных. По революции большевики утворили комисарият камеральных господарств, котрый мае величезны пространства управного грунту, отобраного хлопам. До революции министром был гр. Игнатов, по революции руководит комисариятом большевик Калманович.

Продолженя в слід. числі.

—оОо—

ягоды, малины, грибы, сут рольны продукты, котры продаваны разом дадут початок до основаня кооператыва. А кооператывы одны сут в теперешних часах основом дьобрыбыта.

Выказали того инши державы, як Німеччина, Дания и т. д. Нужда не скоро загляне в очи селянину с Дании, бо он сам держит в руках всі свои интересы.

## Пожиточна рослина

У нас по селах мало дбають о сады. В послідных аж літах видно по гдекотрых селах и то переважно по скомасованых засаджены деревка яблоней, груш и т. д. Не видно однак праві нигде ани космачей<sup>1)</sup>, ани винничок<sup>2)</sup>, хоч оба тоты крякы могут давати селянину красны доходы.

Особенно на увагу заслугують космачи через того, же овочи продає ся зелены и ніт обавы, штобы их оборвали діти. Ціна ест добра, бо 40 до 50 гр. за 1 кг. С космачей можна мати добру овочеву юху, можна варити с них компоты, конфитуры и галареты, прото покуп на них ест все.

Космачи оплачат ся плекати и с того взгляду, же ніт с нима дуже клопоту. Перекопати добре под корчем землю в осени и на весну и обложити корчи под зиму гноем, а на весну посыпати попелом. Старати ся, штобы под корчем было чисто и не росла трава. Грунт любяť насвітлений, положенє тихе, без вітров.

Садити можна коло плота, або коло стежки. Зриват и продає ся, як выроснут великы, але сут ище зелены. Дозрілы сут смачным и здоровым овочем.

Достати можна у каждого огородника. Розмножують ся с галузок.

Подобны корчи мають винничкы, але овоч меньший, округлый, червеный або чорный. Надають ся чудно на овочевы вина. Особенно винничкы чорны дають прекрасны и барз смачны и здоровы вина червены.

Вимогы грунтовы мають такы самы, як космачи.

<sup>1)</sup> Космачи = агрест, гєгадзы (назва, уживана в пов. короснянском, дуже трафна, бо овоч ест космачый).

<sup>2)</sup> Винничкы = порічки (назва, уживана в пов. короснянском, также дуже трафна, бо овоч подобный до винограду).

## Має появиити ся нова газета.

В коротком часі має появиити ся нова газета, п. н. „Малорускый Голос Карпатскый”. Газета тотя має быти редагована в языку малоруском и має стояти на плятформі сотрудиництва господарчого и державного с поляками, операючи ся на основі, же чим сильнійша держава, тым лучше живе ся в ней людем.

Перезначена ест она для населеня Гуцульцины, Бойковцины и Лемковцины. Газета буде выходити в Самборі.

**Новы подводны лодкы Німеччины.** Дня 4. т. м. спущено на воду 12 новых німецкых подводных лодок. На порученє канцлера Гитлера той флотылі надано імя поручника Льоза, котрый згинул в часі світової войны недалеко берегов Англии, яко комендант подводной лодкы „У. 50”, затопленной через морскы силы Англии.

—оОо—

## Што чути в світі и в краю

**Злочин большевицких агентів в Швейцарии.** Широком ехом отбила ся в Швейцарии вість о новом злочині совітских агентів, пополненой на комунисті І. Рейсеі, котрого найдено с 4-ма кулями в голові меже Льозанном и Женево.

Рейсе был высланный яко комунист до Франції а пак до Венгрии. Там мал он пронаговати комунизм. Початково выполнял он приказы с Москвы, але погодивше хотіл выпофати ся с політычній діяльности комунистычній. Знаючи о том, же може быти сліджений, змінял он назвиска и місце перебуваня.

Помимо того большевицкы агенты отнашли его и убили. Часть убийц Рейсеа полиция зловила и осадила в арестах.

**Злива в полночной Италии.** В цілој полночной Италии от тяглых и сильных дожджей выляли рікы, выряджаючи величезны шкоды. Прибережны села нашли ся под водою, а мосты и дороги были позриваны.

**Дві великы желізно дорожны катастрофы.** В полудневой Франції мала місце страшна желізнодорожна катастрофа. Два скоры поїзды наїхали на себе и розбили ся. В катастрофі згинуло 8 людей, а 50 вст тяжко раненых.

Друга меньша катастрофа мала місце в Румунии, где поїзд скорый наїхал на поїзд товаровый. С под решток розбитых комплетно вагонов выдобыто 10 трунов и 22 людей тяжко раненых.

**От грому запалили ся бальоны.** В часі страшной бурі в Англии гром ударил в 10 великих, наїходячих ся в повітрі бальонов, належачих до оружных сил Англии. Бальоны запалили ся и упали на землю.

**Смерть сліпого летчика в часі лету.** В Бразылии забил ся в часі лету отемілий летчик Адгерваль да Коста Олира. Знаменитый тот летчик стратил зрїне в результаті катастрофы летничой ище в р. 1934. Помимо того не перестал быти летчиком и отбывал дальше леты. Был он одынакым на світі летчиком, котрый помимо утраты зрїня не перестал літати на самолетах аж до смерти. Смерть его выклікала в Бразылии велике вражене.

**В Палестыні дальше безпокойство.** В Палестыні вст дальше неспокойно. В послідных часах занотовано там ряд таинственных убийств, с котрых найстрашнійше было убийство англицкого комисара провинции Галилеи, котрого застрілено в часі, коли он выходил с костела. Арестовано много людей.

**На Полісю маса волков.** На Полісю появили ся волкы, котры кырделями нападають на людей и живой инвентар. В селі Малы Стеблевичи волк порвал 6-літню дівчинку, в Лунині — два бараны, а на полях села Йовичи волкы порвали стадо гусей и пару овец. Населене боит ся, же число волков в зимі поднесе ся.

**Складал гроши в бочці для злодія.** Купец львовскый Адам Оконскый (ул. Рагозы 5) ховал гроши до бочки, котра стояла в пивниці. Ктоси подсмотріл касу Оконского, добрал ся в ночи до оригинальной касы и забрал с бочки всі гроши, котрых было 2.100 зл.

**Перун забил двоє курят под куром.** В часі бурі, яка перешла над Гуростовичами перун ударил в будынкы одного хлопа и спалил стінный годинник. С годинника перешол на дылины и перепалюючи их трафил до царку с курами, убиваючи двоє курят, котры сидили под крылами старой куры.

Старой курі нич ся не стало. Перун оставил по собі сліды в виді дыр в окні и дылинах. С домашних никто не дознал ниякой шкоды.

**Літающий ровер.** В Италии два роверисты: Босси и Бонони вынашли ровер, котрый може уносити ся в повітрі. Має он на переді пропелер, порушанный педалами. На таком ровері взнес ся на 10 м. в повітрі званыи роверыста Гаско и перелетіл близько 1 км. на очах многих зрїтелей.

**Можна си поісти и попити и не платити.** В Дании в місті Фридериксгавен вст реставрация, в котрой можна собі поісти и попити и нич не платити.

Гостям, котры там приходят дав ся карткы с таким налісом: „если можеш, то заплат; если можеш и стати ты на то, то заплат веце, а як не маі грошей, то зрб то, другим разом”.

Гості, котры там приходят, мечут гроши до пушки и никто их не контролює. Сут и такы, котры платят веце, як ся належит. Сут однак и такы, котры не платят нич. Властитель реставрации не нарікат на своих гостей. У нас, здає ся, така реставрация внет бы збанкрутовала.

**Ангеликы - индияне.** Перед 70-роками выбудовано в Канаді костел, перезначеный для червеноскорных индиян. Будовельным материялом было дерево оброблене на місці ручно, в будынку ніт ани одного гвоздя. Повала вст сина, а на ней маса золотых звїздох. На фирмаменті том видно ангеликы, серафины и херувины, всі о личках червеных, индийских и о черных чурынах.

Помысел тот поддал оден мисинар, котрый уважал, же такы ангеликы - индияне будут найсильнійшим аргументом для индиян, же мають право и могут достушити вічного счастья в небі.

**Катастрофальне обсуване ся землі на Буковині.** В селі Полициор на Буковині зачала ся завозити рантовно земля. Цілы бльокы зе-

млі впадають в долину с высоты около 20 метров, а на поверхні творят ся отворы, широкы нераз на 4 метры.

С глубины землі доходят отголосы, подобны до громов. Шість осель вст цілковито знищеных, а в инших 7-ох повстали великы шкоды. Населене втіче с zagrożеных місц. Причином катастрофы має быти подмыте терену, котрый вст незалисеный.

Ріка Балигеаса змінила цілковито не лем корыто, але также напрям бігу.

**8 выроков смерти в Совітах.** Специальный трибунал верховного суда автономичной Республики Аджарской засудил 8 членов контрреволюційной организации, меже нима и президента той республики Льоркпинидзе, на кару смерти.

Характерыстычне вст, же всі засуджены признали ся до вины и каляли ся. Процесс тот напминает в цілости давнійший процесс Каменева и Зиновиева и также процес Радека и Пятикова и то не лем под взглядом содержания, але также и формы.

Як втотчас, так и в том процесі всі засуджены оскаржали сами себе, понижали свое достоинство и величали непобідиму силу СССР, и справедливость совітских судов.

Головный засудженный, президент республики Льоркпинидзе калял ся, же запродал ся чужой державі и руководил организациом контрреволюційном и стреміл до обаленя совітской власти.

**Ворошилов заповідат войну с Японией.** Францускы газеты доносят, же Ворошилов в часі промовы в Минску, заявил меже иншим: „Николы не были мы так близкы войны, як тепер. Заносит ся на велику бурю. Нехай каждый шикует ся до великих событий и нехай каждый буде готов боронити отчину”.

Газеты поясняют тоты слова, же в виду того, што на западі Рбісія сусідує с Польщом и Румуниом, где не грозит опасность войны, слова Ворошилова належит розуміти так, же Совіты допускають возможность войны с Японией.

**В Редакции „Лемка“ в Крыниці можна достати ріжны книжочки религиозного содержания.**

КТО ХОЧЕ ЗАБЕЗПЕЧИТИ СЕБЕ НА СТАРОСТЬ И РОДИНУ

ОТ НУЖДЫ И ГОЛОДА, АБО ЗЛОЖИТИ ДІТЯМ ВІНО,

НЕХАЙ ЯКНАЙСКОРШЕ

**заасекурує ся  
в асекураційном Товаристві  
ВИТА И КРАКОВСКЕ  
во Львові**

Асекурацію приймають на цілој Лемковщині  
представителі: гг. Осиф Ямовицкый — Крыница - Село  
и Михаил Перелом — Сянок.